



Cuira, ils 25 d'avrigl 2023

Communicaziun a las medias

Markus Solinger – nov secretari general da la Lia Rumantscha

La suprastanza da la Lia Rumantscha ha elegì Markus Solinger sco nov secretari general da la Lia Rumantscha (LR). Cun questa elecziun preschenta ella ina persuna directiva versada sco schef da l'operativa da l'organisaziun da lingua e cultura. Markus Solinger ha rimnà durant blers onns experientschas en la lavur d'associaziuns cun gruppas d'interess en las differentas regiuns linguisticas da la Svizra. El entra en uffizi il 1. d'avust 2023.

Markus Solinger (*1968), oriund da Scuol ed actualmain sesent a Maur (ZH), ha experientschas multifaras en differentas posiziuns e branschas en in ambient naziunal ed internaziunal. Il novelegì secretari da la Lia Rumantscha è oriundamain commerziant ed ha absolvi in studi d'econom da manaschi SAS. Omaduas scolaziuns ha el fatg a Cuira. Sco commember da la direcziun maina Markus Solinger dapi diesch onns las partiziuns marketing e scolaziun da l'Associaziun svizra da l'industria da gas. Tar sias incumbensas tutgan tranter auter la gestiun da la marca, l'elavuraziun da strategias da communicaziun e marketing, la realisaziun da mesiras da promoziun, da campagnas, da sponsoring, d'occurrências sco era la perscrutaziun dal martgà. L'intermediaziun da savida cun scolaziuns ed occurrências spezialisadas tutga medemamain en ses champ da responsabladad. Markus Solinger è plinavant versà en dumondas en connex cun il svilup organisaziunal, la transfurmaziun digitala e la represchentanza dad interess sin champ naziunal. Sper sias duas linguas maternas rumantsch e tudestg discorra el talian, franzos, englais e spagnol.

«La funcziun sco secretari general da la Lia Rumantscha ma permetta dad esser pli datiers da mias ragischs e da tgirar e sviluppar noss stgazi cultural – il rumantsch. Mia visiun persunala è ina Lia Rumantscha sco center da competenza che pussibilitescha e promova il svilup da la Rumantschia. Quai vulain nus cuntanscher cun servetschs che sa drizzan tenor ils basegns da las Rumantschas e dals Rumantschs. Impurtant è qua ina communicaziun interna ed externa che jau vulesch intensivivar. Jau ma legrel fitg da m'engaschar per la Lia Rumantscha e da pudair contribuir cun mias experientschas da lavur sco era cun mia motivaziun persunala al futur da la cuminanza rumantscha», di l'Engiadinais da 55 onns davart sia elecziun sco nov secretari general da la Lia Rumantscha.

Pronts per il futur

La suprastanza da la Lia Rumantscha, presidiada da las copresidentas Urezza Famos e Gianna Luzio, è satisfatga da pudair preschentar cun Markus Solinger ina persuna versada en divers champs sco nov capo operativ. «Grazia a l'experientscha da plirs onns sco commember da la direcziun e manader d'ina partiziun en in'associaziun ha Markus Solinger il savair necessari per manar in'operativa en in ambient cumplex. El vegn da l'economia da manaschi cun ils roms d'accent marketing ed informatica/organisaziun. Markus Solinger è fitg motivà da s'engaschar per novs svilupps en la promoziun dal



Lia Rumantscha

rumantsch che stattan en connex cun il svilup e la communicaziun digitala», argumentescha Urezza Famos, copresidenta da la Lia Rumantscha, l'elecziun. «Las cumpetenzas da Markus Solinger s'accordan fitg bain cun ils champs d'acziun che nus vulain e stuain elavurar pli fermamain en futur. Plinavant enconuscha el bain la situaziun linguistica en il chantun Grischun, ma era – per experientscha – quella en la diaspora rumantscha. Nus essan fitg cuntentas d'avair pudì gudagnar Markus Solinger per la Lia Rumantscha», agiunscha la copresidenta da la Lia Rumantscha Gianna Luzio.

Dapi l'extrada da l'anteriur secretari general Diego Deplazes il december 2022 è il secretariat general da la Lia Rumantscha occupà ad interim cun Andreas Gabriel. L'emprim d'avust 2023 surpiglia Markus Solinger la direcziun da l'operativa da la Lia Rumantscha cun actualmain 21 collavuraturas e collavuratur en var 13 plazzas cumplainas en la sedia principala a Cuir ed en ils biros regiunals a Glion, Savognin, Scuol e Vargistagn.